



Nunanit allanit aningaasaliinerit ilaasa misissorneqartarnissaat pillugit Inatsisartut inatsisissaattut siunnersuut

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut
Naligiissitaanermullu Naalakkersuisoq)
(Siullermeerineq)

Siunnersuutip matumap saqqummiunneqarneranut, piffissarlu eqqorlugu aamma pisariaqartutut alloriarnertut isigisatsinnut Demokraatit aallarniutigalugu qujarusupput. Nunarsuatsinni pisut sukkasuumik allanngoriartorput, nunattalu aningaasaqarnerata pinngitsoorsinnaanngisaanut isumalluutitsinnut, attaveqaasersuutinullu inuiaqatigiinnut pingaarutilinnut soqutiginninneq annertusiartuinnarluni. Tamanna pillugu nunatta isumannaatsuuneranik, nammineq aalajangiinissaata, inuiaqatigiillu aningaasaqarnerinik illersuisumik nunanit allanit aningaasaliinerit pinissaat qulakkeerniarlugu alloriarnerput eqqorluinnarpoq.

Nunat allarpassuit maannangaaq atuutsileriigaannik siunnersuutip sakkussaqaalersissavaatigut, tassalu aningaasaliissutissanik naliliinissamut periarfissaqalernerq, pisariaqartillugulu aningaasaliiniarnernik nunap soqutigisaanut sooranarsinnaasunik itigartitsinnaalernerq. Avammut matuniarneq pineqanngilaq, nunanilli allanik suleqateqarnerq uagut piumasaqaatigut malillugit piniassammat, nunani allani suleqatigisat qanoq suleqatiginissaannut ersarissunik sinaakkutissiiniarneq pineqarluni.

Siunertaq tamanna siammasissumik tapersersorneqartoq paasivarput. Transparency International Greenland, Nuna Law aamma Sulisitsisut tusarniummut akissuteqarnerminni uppersarsarpaat, siunnersuut piginnittuunermt tunngasunik isertuaatsuutitsinermik annertusaalluni, aningaasaqarnikkullu namminersornitsinnik illersuilluni pingaarutilimmik, akisussaassuseqartumillu alloriarnerusoq. Taassumap aamma nunatta nunat assigiinngitsut akornanni tutsuiginartumik, siumullu nalunanngereersumik suleqataasutut inissisimaneranut tapersersuivoq.

Kalaallit Nunaanni suliffeqarfiit kikkunnit pigineqarnersut, aningaasallu nunamut isaasut aamma aniasut ersarinnerusumik paasineqarsinnaalissammatta siunnersuummi tamanna immikkut ittumik pitsaaqutaavoq. Tamanna inuiaqatigiinnut, pimoorussillutillu aningaasaliisartut nunatta ineriartornissaanut pitsaasumik tapersiissuteqarusuttunut toqqissisimanermik pilersitsivoq.

Nunanit allanit aningaasaliinernik misissuinissamut danskit, europamiullu najoqqutassaataat siunnersuummi assipalugineqarmata aamma pitsaavoq. Imaappoq, nunani assigiinngitsuni aningaasaliisartut ilisimariigaannik malittarisassaqaasaagut. Taamaalluni pimoorussillutik ingerlatsisut kajumilersinneqarnissaat ajornannginnerussaaq. Tamanna nunanik assigiinngitsunik suleqateqarnermi inatsisitigut isumannaallisaaffigineqarnermut, siumullu nalunanngereernermut nukittorsaataammat



tusarniaaffigineqartut arlaqartut nukittoqutitut ersarissarpaat.

Taassumap saniatigut inuiaqatigiinni ineriartorneq ilutigalugu Naalakkersuisut siunissami misissuinissami malittarisassanik naleqqussaasinnaaniassammata, siunnersuut siammasissumik aamma eqaatsumik atuuffeqarnera isumatusaarnervuq.

Pingaarnertut Demokraatit isumaqarput, maani nunanit allanit aningaasaliissutitut isertuaatsuutitsinerunissamut, akisussaassuseqarnerunissamut, isumannaatsumillu aqutsinerunissamut siunnersuut manna pingaarutilimmik alloriarnerusoq. Siunissamut ungasinnerusumut anguniakkatsinnik, pingaarnersiukkatsinnillu oqartussat illersuinissaannut sakkussaqaalersitsissaaq, ilutigisaanillu naleqquttunik aamma isertuaatsunik atugassaqaartitsilluta aningaasaliinissanut ammalluta nunaasugut, inuiaasugullu ersarissumik oqariartuutigineqarluni.

Taakkua oqaatigereerlugit, siunnersuutip sulii pitsanngorsarnissaanut periarfissaqartoq aamma takusinnaavarput. Isumaqarpugut ilaatigut aningaasaliinerit suut ilaatinneqarnersut, suliallu qanoq sukkatigisumik suliarineqartarnersut pillugit malittarisassat ersarissut aqqutigalugit inuussutissarsiutilinnut qanoq paasinartumik, siumullu nalunanggereersumik pilersitsisoqarsinnaanersoq isumaliutigineqartariaqartoq. Piffissaliussat aalajangersimasut, pitsaanerusumillu paasissutissiinissaq pisariaqartinneqartut tusarniaaffigineqartut arlaqartut tikkuarpaat. Tassunga isumaqataavugut. Suliaq suliareqqinneqarnissaani iluarsissutissat taakkua oqallisigilluarneqassasut aamma kissaatigaarput.

Taamatut oqaaseqarlunga Demokraatit inassutigaat, nunatsinnik illersuillunilu pitsaasumik aningaasaleeriaatsimik tapersersuisumik pitsaasumik, oqimaaqatigiissitsisumillu inatsisitigut tunngavissaqarnissap qulakkeerneqarnissaa siunertaralugu, siunnersuut Inuussutissarsiornermut Aatsitassanullu Ataatsimiititaliami oqaluuserineqassasoq.